

Saradnja sa komšijama

DELEGACIJA BIH I SCG

Koncem 2004.g. Teniski Savez Bosne i Hercegovine doživio je preporod. Na skupštini održanoj u Mostaru, smijenjeno je dosadašnje rukovodstvo. Za predsjednika TSBiH, izabran je Ratko Stamenić, dok su na mjesta potpredsjednika postavljeni Edin Arslanagić i Ivan Brkić. Izvršni odbor broji 12 članova, dakle pored navedene trojice, još devet entuzijasta.

-U TSBiH stvorena je optimistička atmosfera i svi već rade punom parom. Usvojen je Plan aktivnosti i Strategija razvoja za 2005.g. Dio te aktivnosti biće i normalizovanje odnosa sa državama u okruženju, dakle sa TSSCG i TS Hrvatske, kao preduslov zajedničke regionalne aktivnosti u ovom sportu, ali i sa jednom državom iz Evrope, u pitanju je Španija.-objašnjava predsjednik Stamenić.

U cilju pokretanja te saradnje, delegacija TSBiH koju su, uz predsjednika Stamenića, činili i predsjednik komisije za međunarodnu saradnju TSBiH, Milan Radaković i član Izvršnog odbora TSBiH Vladislav Babić, prisustvovala je finalu Challenger na terenima TK Gemaks u Beogradu. Tom prilikom su razgovarali sa generalnim sekretarom TSSCG, Dušanom Orlandićem.

- Ovom posjetom su samo preliminarno razrađene teme, a u toku februara i marta biće usaglašeni i potpisani protokoli. Saradnja će se ogledati u oblasti domaćih i međunarodnih turnira, Davis i Federation cup selekcija, razvojnih turnira za talentovane igrače, sudijske i trenerske organizacije kao sastavnog dijela TS. Radićemo ubrzano i obezbijediti podizanje ukupne teniske organizacije u BiH na viši nivo. –kaže Stamenić.

U 2005.g. usvojeni su novi pravilnici o takmičenju, licenciranju klubova, Pravilnik o rangiranju, usvojen je kalendar takmičenja i određen broj turnira u godini koji je smanjen za oko 50 %. Biće ih ukupno 52, od toga tri muška Futuresa (Sarajevo, Brčko, Prijedor), dva Challengera (Sarajevo i Banja Luka), i jedan za dame u Mostaru od 10.000 dolara.

-Poboljšali smo odnose sa ITF i ETA i ispravili svoje propuste (neplaćanje članarine) i dogovorili način pomoći ovih institucija našem tenisu. U planu je poboljšanje infrastrukture teniskih klubova kao i izgradnja teniskih centara.

U toku februara, u BiH biće održana dvoranska državna prvenstva u svim konkurencijama, raspoređena na tri lokacije: Banja Luka, Sarajevo i Široki Brijeg.

Seniorsko će se održati 26. i 27. februara u Širokom Brijegu i biće selektivno za izbor reprezentacija za Davis cup i Federation cup. Momci će se takmičiti u trećoj grupi Davis cupa Evro-Afričke zone za koju su se izborili prošle godine. Pod vođstvom selektora Bojana Vujića, idu na megdan Egipćanima, a pripreme će biti održane u Banja Luci.

Djevojke će se pripremati u Mostaru, a takmičenje ih očekuje u aprilu u Turskoj, u okviru prve grupe Evro-Afričke zone u kojoj je i selekcija SCG.

- Četiri člana Davis cup reprezentacije BiH dobiće wild card za Challenger koji će ove godine biti održani u našoj zemlji. Znači, dvije za turnir u Sarajevu i dvije za Banja Luku. –dodaje Stamenić.

TSBiH usvojio je marketinški plan koji će dati odgovor na finansijsku stranu Saveza. Izabrani su i medijski sponzori: Dnevni Avaz i Nezavisne Novine, a u toku je razgovor i za izbor generalnog sponzora, zlatnih sponzora, te sponzora reprezentacija i turnira, a taj posao kako kaže predsjednik Stamenić treba biti završen u februaru i martu.